



## I zachatpi sek uh em?\_

I phatnau bangma umlo maleh Beigual tha ei puitung kitta lopina zosia Lalpa Pathian Chu changing taken! Kumsin le kochuam tamtakin September tha hi Beigual tha in I mangsek in, khenkhatten tamtaka I lawkpiu gingchak a um a, ahinla khenkhat a dingin chimchak um leh dan pangai guala chia liamsak jel ding Chu gingchak a um ahi. Ahinla, kochuamten hiatmillo ding khat Chu mi tinin I tuga chiat uh chu phalbi hun a beijel sek gual in bei puantin, a ga chu luak kit ngei ding ihu, to Lalpan ei hil ahi. Tuni hin Lalpa'n ei hil kit anuam alum 2019 ah Beigual tha hi ei musak kit ahijaw ahi. A kipak um nalawm lawm e!

Bible chun, **“Kuale, kei-ma leh ka thu zapi tapo chu, Mihing chapa'n, ama lopina tawh, a Pa lopina tawh, vawsawlchak thiangthote lopina tawh a hung phat leh zia mi chu hun japi in a.”** (Luka 9:26) ti'n ei hil a. Zia taka japi tihi, dawilo leh nawl tina lam a kawh hi. Ama dawilo ah nawlte haw chu vaihawmna ni ah chun ei hun nawl kit ding ahi, ti ei hil ahi pen hi. Aziak chu kuanle i tuga chiat uh chu a ga luak khawm kit chiat ding ihu ahi. Zia thu hi mihingte leh khawvel chiadan mai ahipua, Pathian hina(nature) ahi ziak ahi.

Khanglui, pi leh pute'n, **“Suaklu kung ah chun thei dang a ga thei puai”** atigual un Bible ziltilna le ahi kit hi. Mi kuale

tisa lama thetu chun tisa lam ma in luak khawm intin, thagau lam a thetu chun thagu lam ma in luak khawm ding ahi (Galatia 6:8) ti'n Paul in ei hil ahi. Jesu Khrista kilepsan leh tuhun ah bangma ngailote chan ding chu Paul in kichian takin ei hil ahi.

Jesu Khrista ziltiltu lopi tak mai leh I Pathian uh hiding le zachât um ah ngailotu khan ei hepi a, kumtuang hina lampi ei siapiak ahi, ti hia'n khawvel damsung hun chawmcha sung ahin ama bep hi i hinkhua ah thuneina i piak zing ding uh chu ahi. Bangkim zosia itlo leh phal taka ei malzawltu chu i japilo ding uh ahi. A chutilo chun, ama ngei inle ei hun zachâtpi hun um ngei ding ahi ngala!

Zia hun tak chule Lalpa! Lalpa! ti'n kiko maleu hin le kikhel tan a. Upate'n "Van ka et leh a sang a, Lei ka et le a niam hi" atigual un zia ni chu lungzinna ni hung hitan a. Ziaziakachun, tuni hin i lungthim leh ngaitua-na'u, i taksau leh i gênthiamna zosia'u ah Lalpa lopina chu i suklat jel ding uh ahi.

### **Khawitak mun in i zachatpi sek uh em leh?**

Hun chuam chuam leh mun chuam chuam in Jesu Khrista chu ka Lal ahi tia ipan ngamlonau(i nawlnau) khenkhatte vak ngaitua khawm hitiu:

I gentak gual un zachatpi tichu nawl, dawilo tina ahi. I Lalpa Jesu Khrista chun, "Keima'n ka hun hepi gual ahin, nangmau le kihepitua chiat un," atia. Zia hi Lalpa Jesu Khrista'n ama juitute leh ama nawllote bawl dinga thupiak a nei chu ahi. Zia thute hi i vak ngaitua a, eimau Khristian hindan tawh i buktua ahi chun a thupiakte ahin umlo hileu hin uh a kilawmna mun a tam ma ma jiang ahi. Ka lal dawu um hun zachatpi puang ka ti maleu hin uh, midangte tawh i kal thu uh ngaitua ahin hiatlo kal a Jesu Khrista i nawlnaua hisek ahi.

Paul chun Philippi koch-uamte kiang in, "La um dan uh leh Khrista chanchinpha kituak hen" a la tia. Khrista chanchinpha chu midangte hepi ding leh Khrista lungthim put jing ding chu ahi. Himaleh, gingute'n chiadan tangpi ah i nei tãk chu ahi le thangsiatna, ensiatna, eima bep kihepina leh a diklo mujing ngal ah a dik khat chu mawsak tei teina gam in i khawsazo tau ahi. Pawlam Khristianna hi paithak hun hitalo maw? Khrista chanchinpha tawh kituaklo zosia chu Khrista i zachatpinaw ahijel hi.

Ziaziakachun, Jesu Khrista zachatpilo ah gingtu suan um i hijel theina dinga chun a thupiakte hi i chawihawi a, i dawpsang jing uh chu a pawimaw ahi. Miten musit maleu Khross thil hitheina hi ka Lapi hi hen, ti hijing hen la, Van Jerusalem thak, i tun masiau in zia Lapi chu zachatpilo ah sa jing thei leuhin uh a dawu um ma ma hi. Zia ding ah chun gingtuten pan lathak hitiu.

Lalpan A thu ei malzawl piak ta hen!

.....xXx.....

# I gam-leh-Insung zosia'u khamthei ziakin mangthai ding hita..

## Aw nang khamthei zuaktu latu/lacha khang ah Pathian hansia hungtung ding ahi.

~Rev. Dr. Hangpi Manlun.

### 1).Thumapui.

Tulai i gam, a diakin Lamka khawpi sung, khamthei ziaka nasa tak a siatgawpna leichung ah ichengtau ahi. I chenna Lamka khawpi leh akim akiang ah khantona chuam chuam ah i khanto lai un, da umtak khat ahileh, Zu, drugs leh suauna chi chuam chuamte'n le ikhangto un i minthang mama tau. I gam ah khamthei addict bang zat a um diam? Chuleh, khamthei zuak a nek-hawl bang zat a um ma diam? tite i ngaitua masa hitiu. Rehabilitation Centre (In) le Biakin zat vel phato hial in vengtin in a um tai. Zia gual mun ah kikhumzote chu mineizo dawmte ahiu a, zi-atilote sia chu khawlai ah guk ding hawl ah In leh Lo taisan ah vak le tamtak a um tau ahi.

Chun, nisin in khamthei ziakin thina tuak tamtak i vui ua, a tangpi'n mithite i et le kum 15-40 velmi ahideu ui. Zia gual ahin i chiajel ua chun

khang kibasam ding ihu. Nu-leh-pate'n, a cha it taktakteu a etphat ua le amau vaktu ding, enkawltu ding leh vuitu dinga kinepna a nei lai un khang-dawng/ khanglaite a hunlo ah sôn a tamzaw phial i hitau hi. Ziabanah, nu leh pa tamtak beidawnga gending helo in building In sung ah giakmaw va bang in ipmu theilo in a um ui. Bang pap khat pua ita diam ti hiatzaw ahita puai.

### 2). Khawvel pumpi a khamthei hung kipatdan tangpi leh dodal dante:

South America-ten ni-danglai in, thingdua khat ala thai sek un, atawp in zia kipat chun 'Cocain' khamthei ahung piangtai. I gam ah i chin nasat ma mau Kaani (poppy)-hi Lalpa Jesu pian masang BC-300-laivel a la um zota hin a kigen hi. C.R. Alder Wright in kum zabi 1874-lai-in, Kaani a kipatin Heroin ala bawl hi. Zia Kaani a kipatin Morphine, Her-

oin, Opiumte leh adangdangte a kibawl kit hi.

**2.i). Khamthei in a suksiat gamte suina:**

USA-te ma khu khamthei ziak a haksatna tuak masapen gam ahiu. A gam government-in, “Khamthei chu siatna tuntu gal/melma lian pen” ti’n ala puang tawp mai ahi. Kum 1991-vel in, khawvel gam/solkal guk(6) khamthei in a sukbuai dan a suinau in ziagual hin a mu’u ui, tudin mun ahin a le tamzaw pungzaw maithei ahi. Ziate chu:

- (2.1.i). Iran gam ah drugs addicted mi 10-lakhs sanga tamzaw um ding a hisap ahi.
- (2.1.ii). France gam ah mi 1.5-lakhs sang a tamzaw um ding in a suidaw ahi.
- 2.1.(iii). Holland gam ah 2, 40,000-vel um ding in a hisap ahi.
- (2.1.iv). Australia gam ah 1, 80,000-vel um ding in ahisap ahi.
- (2.1.v). USA gam ah 6.70-lakhs umdinga ngaitua ahi.
- (2.1.vi). India gam ah 8-lakhs val vel um dinga sutdaw ahi.
- (2.1.vii). Europe gam tumlam ah mi 100,000-val um ding in

ginchat ahi.

**2.2). Khamthei dona nasep dan:**

USA gam in, kum sin in drugs chawkna ding in US \$ 26 to 32, tuk-leh-ding awn-vel a subei zel sek u’i. Kumsin nausen piang 375,000-te chu drugs addicts te chate ahiu a, nu-leh-pate sepga pap pua-in drugs addicts sa-in, ahung piang u’i. Chuleh, US President Richard Nixon, a hun lai in khamthei dona (drugs war)-ala puang hi. Kum 2016-in, Philippines President Rodrigo Dotterel in a gamsung a khamthei bawl mi a singtel in alathat a, ahin beid-iaklo ahi.

**3). Khamthei bawlte ahem diklo? a zuakte?**

Nidanglai in, Zu hi khamthei lau umpen ala hin, tula in Zu sang a lau umjaw at-ama, Zu-chu a naupa’u asuak tai. Etsakna dingin- Dendrite, RP, No.4, Kaani, Kanja, WY-leh adang tamtak a um tai. Nangin sum-leh-pai dawina ziak a, khamthei la zawk ziak in, micha minau thi hunlo a lathi sak leh nang khamthei zuak nu/pa chu amau thattu la hi ziaikin, nikhatni le Pathi-

an vaihawmna masang ah la ding masang inle, zia leichung hinkhua ma ma ahin le Pathian thangtawmna, nang-leh-la Insung ah ahung tung ding ahi.

Chuleh i hiatchiatsa'u gual un Zogam film minthang mama, 'Ngai anglai film'-a, a nungaknu pa'n Insung siamna ding leh sum-leh-pai dawina ziak a, No. 4, ala zawk leh a ginchatlo leh kineplopi'n achanu ala kikap a, a hunlo-pi'n a thi phat in apa'n a pillaw pan hi. Zia gual film a hung bawl uh tawh kibang khang ah ichengtau ahi. Micha/minau it takte thina ding a No.4 leh khamthei zuaktu/petu chu ahi-atlo kal in ama chanu chung ah apap ahung tung thu ei kawkmua ahi. Khamthei ah la sak building sung ah nangma chanu/chapate a hunlo in thi intiu in, la golua ding umlo in thalek gamkeu ah cheng bang ding la hi.

Ziabanch, khamthei neleh-kikapte a diklo gual gual un, a zuakte chu a bulpantu ahiziak un a nete i mawsak ua, i sawisa'ua, a beitheina dinga a zuakte le nasa tak a etkawl a hunta ahi.

#### **4). Zu (Khamthei) zuak chu Pathian hansia channa ahi:**

Khawvel khangthu ah mitam tak Zu leh khamthei zawk ziaka vangsiatna a Insung ua tung tamtak a umta ahi. Ahin, tuchung ahin, US-gam a, Inkuan thupitak mai Pu Kennedy-te Insung ah Pathian thangtawmna-leh-hanselawna atun dan sut khawm hitiu. Achawm kimin, Zu a zawk ziak un Pathian lungnatna huaisetak a Insung ua khang tamtak a tung hi. Abul ahileh, Apu'u, Joseph Kennedy in President Roosevelt phalna in Scotland apat USA-ah, Zu la lut in azuak a, tichun, ahung hausata mama ahi. Ahin, a Inkuan un Pathian dawilo nasem ahitak ziak un, ama-leh-a chate chung ah lawsapna chi chuam chuam a tungto pek ahi.

#### **Zia gual hin a tun dan ensuk hitiu:**

A khang gui uh chu kum 1941-a kipat in 2000s-chan a kisuina chun, zia gual hin vangsiatna ala tuakto pek ui:

(1). Kum 1941– Kennedy te Insung ah a pa pen uh, Joe, chanu upa pen, Rose Mary Kennedy chu a lungthim lam

hawilona ziak in operation (at in) a um a, ahin, Rose Mary chu aki-at zaw nung kum 8 inle a phachuam zo puai.

(2). Kum 1944—in, Pu Kennedy-te Insung ah a cha upa pen Joseph Patrick Kennedy Jr, chu apa'n politics sai ding in adawisak ma ma mai chu lena puakzak (accident)- in a thi-tai( 3). Chun, Ted Kennedy, chu lekhatiam leh mi fel tak ahin, USA- President hi ding lunggul jing hinapi'n, changzolo in a haisan tai. John Kennedy inle USA President hiding chu nasa tak in la tup a himaleh, a hun tung masang in a thi kit hi.

(4). Kum 1948-in, Kathleen Kennedy, John F. Kennedy suapi nu le a pawsal it tak Cavendish Marques tawh a kichengzaw kum lina'n lenna ah accident in a thi kit hi.

(5). Kum 1961-in, Joe Kennedy Sr. in stroke natna nasa tak a nei hi. Tichun, a tawp in stroke-ziakin a jeng a pautheilo in a um tai.

(6). Kum 1963-in, Jackie leh John F. Kennedy-te chapa masapen, apian lim in a thi ngal hi. Ziaban ah, acha nina uh Patrick Bouvier Kennedy le kumni

(2) a phak in a thi kit ahi.

(7). Kum 1963—in, John F. Kennedy chu USA-President 35<sup>th</sup>-na in term/hun khatsung ahung pang hi. A hun/term nina ah le mipite'n dawi ma ma nalai hinapi in, November 23, 1963 in Texas khopi ah migilo, Lee Harvey Oswald kitipa chun ala kap lumta, a thupina zosia a taisan tai.

(8). Kum 1968-in, Robert “Bobby” Kennedy chu US president ding in Primary Election a telt-ing ahia, teltung taktak ahi masang a campaigning a bawllai tak in kaplup in a um kit jel hi.

(9). Chun, Edward Kennedy chu USA House a Senator khat ahia, President dinmun lunggul khat le ahi. Himaleh, ama personal secretary nu nungak tawh gari accident a tuak ua, zia nungaknu a thi ziakachun minsetak in President ahi theina ding kinepna mansua tai.

(10). Kum 1969-in, Ted Kennedy car chu tui laka accident in numei khat in thina ala tuak law ahi.

(11). Kum 1969-in, Kennedy pa, Joseph Patrick Kennedy a thi.

(12). Kum 1973-in, Ted Kenne-

dy Jr in naupang chakhat ahi in cancer natna ziakin akeng tanpiak in ala umtai.

(13). Kum 1973- in, Bobby Kennedy's chapa, Joe Kennedy iii, car accident in a pang kha numei khat a jenglaw hi.

(14). Kum 1984-in, Bobby Kennedy's chapa, David Kennedy, chu khamthei overdose in ala thi ahi.

(15). Kum 1997-in, Michael Kennedy, Bobby Kennedy's chapa, chu accident in ala thita ahi. A thi masangin a chate enkawltu soal(rape) ah ngaw in a um hi. Chuleh, Rehabilitation ah khum in ala um hi.

(16). Kum 1999-in, John F. Kennedy Jr. aji it tak mai, Carolyn Bessettete chu lenna accident in a nupan un ala thiu ahi. Tichun, agam sung pumpiu ah a sun ua, amau khang a dinga 'White House' a umthei ding kinepna le a beita.

(17). Ziabanah, A chapa Jr. Kennedy le lekhathiam leh feltak himaleh Miami Beach ah nungak khat pawngsual a ngaw a um in a minse kit hi.

(18). Kum 2008-in, Ted Kennedy chu thuak cancer vei in aum hi.

(19). Kum 2009 -in, Ted Kennedy in cancer natna thuak zolo in a hinna a chantai.

(20). Kum 2011-in, Ted Kennedy chanu neisun, Kara Kennedy-Allen, chu kum 51-ahi in, a thitai.

(21). Kum 2012-in, Mary Kennedy, Robert Kennedy Jr. jinu chu ama-le-ama suicide in akikhai lum hi.

Zia achung ah i gen zosiau hi a Insung uh leh a khanggui ua Pathian lungnatna a tuakna ziak uh ahileh, Bible in "A Invenge kiang a dawn ding Zu pete chung a gik hi," a ti chu amau lnkuan chung ah tung ahi i tithei ahi. Chun Bible in "La tu gual gual at ding la hi" a ti hi a guitungna ahi (Gal.6:7).

Awle! A chung a igen-gual un Zu hi tulai khamthei lak a anep ma ma a suak tai. I Bible uh asut lai un, khamthei i genteu hi um nailo ahin, Bible ah i muthei chu ahileh Zu hawilo dan ahi. Ahinla, tulai khamtheite hileh Zu hawilo dante sanga huaise zaw ngen ahitai.

Chun, nang-leh-kei hi kuama'n Pu Kennedyte khanggui asui gual un ei hung sutlo

ding ahi. Ahinla, Pathian in zia leichung ah la damsung ah la hindan gual gual in la khang-gui ah nasem ding ahi. Chuleh, i hiatt ding ua pawimaw chu Bible kizik lai ahin tulai ah i zawk uh khamtheite haw hi a um nai pua, um hitaleh genkha ngei ding ahi. A genlo vangin tu khanglaite siatpi khamtheite hi Zu sangin alau umjaw ngen ahiu. Ziaziakachun, Pathian lungnatna chu ei uh chung ale tung thei ahi ti i hiat millo ding uh ahi. Bible in kei khangni khangthum a phuba lapa ka hi atia, tulai in, a khang gen taklo in ituga chu tu-i damsung ma ma un in i at pai pai mai u'i.

### **5). Ziagual dinmun ahilai ahin kochuamte/puitute kha-wi ah i um uh em?**

Ei thingtang mite hi za-ah-za (100%), chu Khristian i hitau ahi. Zia chu ahilai in, I gam siatna zia gual tuk ah a um mai hi thil lamdang leh vangsiat um tak ahi. Chuleh, I gam siatnate hi Pathian kiang ah kochuamte'n lungthim munkhat pu' ah i pauchap dup dup uh a hun tak zet a, zia gual ah chun bawl leu hin I gam un damna hung um intin,

Pathian leng gam keklian zaw ding ihu. A ziak chu kochuamte hi zia khawvel ah thaumei leh chi(salt) gual ah al ding ihu ahi ( Mathiu 5:13-15).

Ziaziakachun, khat leh khat khut kitutua in Pathian buan ding in kochuamte leh puitute i khatlaw uh a hunta ahi. Aziak chu, I Lamka khawpi sung ah thilsia khat a tun leh kuama nam leh kochuam a suakcha ding a um diak puai. Ziabeplo ah chun, taksa leh thagau ah kitimat leh u leh nau ngen chang ihu ahi.

Pu John Knox in Scotland gam a siatna nasatak a tunlai in, Pathian buan in, "Lalpa Scotland ei pia'n, ahilo leh ka hinna la mai in" ti'n Pathian ala buan a, halthakna thupitak a tunlaw ahi. Kua ahem I Lamka khawpi a dinga John Knox ding chu? Nang-leh-kei i hithei u'i, a man i piakpei po ua le.

Lalpan simtute zosia ei mapui chiatta hen! Amen.

---o0o---



# THAGAU THIANGTHO NASEP

~Rev. Lienthienmang

Thagau Thiangtho min hi Bible ah tamvei tak mat ahin, hilchetna le tamtak a um hi. Chuleh gindan le tampi a um ziakin Thagau Thiangtho chungchang hi a chang le genchian a hak ma ma a, a chang le bailam taka gen jiangthei hile kilawm in a kilang hi. Khristian tamzaw Trinity zuite a dinga chun Thagau Thiangtho chu Pa tawh Chapa tawh thil hitheina tawh lopina tawh bangkim a kibang a kawi ahin, ahinla Oneness Khristiante a ding in zia thu hi hiatthiam haksa deu maithei ahi. A ziak chu amau a ding in Trinity hi ginchak umlo/pawm dan diklo ahiziak ahi.

Bang chu hijiang taleh Oneness Christianity ahiloleh Trinity pawmte a ding inle Thagau Thiangtho hi a paw-imaw ma ma a, zia Thagau Thiangtho panglo chun gingtute a ding in panpitu umlo ahiziakin umzia bei ahi tile hin le tikhiallo maithei ihu. Lalpa Jesu Khrista van ah a kalto dinga khan zia Thagau Thiangtho hi ei a ding a hun sawl piak ding leh Jesu Khrista thasang a khawvel ah Pathian in mihingte laka nasem dinga a kawi ahiziak in Jesu Khrista thasang ah nasem ahi tileu hinle tikhiallo ding ihu.

**1.Thagau Thiangtho hi kua ahem?:**

Thagau Thiangtho hi Pathian apat mi pathumte laka kipat a pathumna ahi. Thagau Thiangtho hi Pa leh Chapa gual ah taksa phe, tivo neilo ahiziakin mihing mit in vang muthei ahi pua, khawi le khawi khak thei ahi puai. Himaleh Thagau Thiangtho chu mihing gual ah kihopi thei, kipawlpi thei, dawt leh biak thei ahiziakin mihing gual ahina a tam ma ma hi.

Thagau Thiangtho mihingte a dinga hiattheina umsun chu, mihingte'n Pathian ah ginna a hung nei ua, ginna ziaka kalsuan ding a hung guat phat uh le zia taka chun Thagau Thiangtho mutheilo, khaitheilo chu zia ginna neitu leh ginna ziaka

semtu a dinga chun hiatthei in a hung kilang sek ahi.

## **2. Thagau Thiangtho nasep:**

Thagau Thiangtho nasep gen ding chuam chuam a um a, ziate laka chun point 3 vak gen hitiu.

### **2.1. Mimal panpitu ahi:**

Thagau Thiangtho chun mimla hinkhua ah nasep tampi a nei a, ziate laka pawimaw pen pente laka khat chu mi kua ahem chun Thagau Thiangtho panpina zal in zia khawvel ahin hinkhua nuam takin a mangthei a, a ma a dinga chun zia khawvel ahin thangsiat ding, etla ding ahem ahiloleh, mi êna, gensiatna lungthim a nei puai. Zia bep chu hilo in Thagau Thiangtho panpina zalin zia khawvel bep hilo in vangam tiang ale mun chang ding ahi.

### **2.2. Mimal hinkhua kisâng-na:**

Mimal hinkhua hi sang danglam jiangthei chu ahi. Hinkhua lui apat hinkhawthak zawp jiangthei ahi. Ahinla, zia hinkhua kisang danglam jiang thei ti hi thil bailam ahilo ziakin mitamtak a dingin a haksa ma

ma a, sang danglamzolo ah lawsam tampi gending aum hi. Alelam ah, a sângjiang theite a ding inle kilekit a bailam a, pukkit paiziang thei ahiziakin zia laitak hhi mihingte a dinga thil haksa penpente laka khat ahi. Ahinla, mi kua ahem chun Thagau Thiangtho panpina zal ah thil a bawl chun lawsap a um ngai puai. Mimal hinkhua le bailam takin a sêngthei a, bailam tak in a bawl hawi thei hi. A ziak chu Thagau Thiangtho hin thil hitheina lopi tak a nei a, zia thil hitheina chun mihing lungchang khaui pen leh suangguah ah tâkpen pente le a sunem a, mihangsan leh dawilakte lungthim le thunun thei in amau mimal dawina lam sangin Thagau Thiangtho dawina lama a puizaw sek hi.

Mitamtak in agensek uh mikhat piangthak hingal ah chawmlo kal ah puk ziang sek chu bangti a diam? a thagau chan a diklo a diam? ti hi a hisek hi. Zia dawtna dawnhuna vang tampi um intin kibang veklo ding ahi. Ahinla, ka hiatthiam dan ah chun zia pukna hinkhua ahin a kile kit ua, piangthak hingal a nungchang/

hinkhua kithen theilona haw zosia ziak hi Thagau Thiangtho puihuaina sanga amau mimal/ mihing lunggel angai pawimaw zawk phat ua le Thagau Thiangtho in a lungthim ua mun changzolo in amau mihing lunggel in a pui zawsek ua, a puk kit sek uh ahi.

### **3.Thagau Thiangtho panlona chu:**

Thagau Thiangtho panlona gen ding tampi um ngei dingin gingchak a um hi. Ziate laka chun Thagau panlona ah gingu le kochuam lam gen hitiu.

#### **3.1. Thagau Thiangtho panlona gingu/mimal hinkhua ah:**

Khristian hingal ah Thagau Thiangtho in a umpilo ahem ahiloleh, Thagau Thiangtho panlona hinkhua ah chun Thagau ga nek ding ahem, muding leh ettawn ding bangma a um puai. A bikin, kochuam pastor leh upate hi mizosia tēna ahiu a, zis kochuam upa ahem, pastor ahem chu Thagau thiangtho in a umpi ahilo chun a gen zosia leh a bawl zosia chu Thagau apat pawt hilo ahiziak un thudin

chanve ah zuau gen ahiu kitile kitikhiallo ding ahi. Ziagual upa hem/ pastor hem chu thudik sangin thudiklo lam le ama lawkna ding bep hawl, melhiat leh melhiatlo kikal khen mi, Pathian in ma sep dingah apaik gual taka thudik leh ginum ah dingngamlo ahitei sek ahi.

Ziagual puitute kiang ah chun thepna tampi a umsek a, kochuam mipite a ding ah chun themtu hawitak a suak a, kochuam sung ale kikhenna a tut ngei ngei sek hi.

#### **3.2. Thagau Thiangtho panlona kochuam:**

Kochuam kiti hi kua ahem khat, zia leisiat ah mipil ahem, mihausa ahem in a phudaw ahipua, Jesu Khrista'n a phudaw ahiziakin kochuamte luchang chu Khrista ahi ti ahi. Ziachu ahiziakin, kochuam ah Thagau Thiangtho a panlo/ umlo chun kochuam chu member tam ziang malehle ahawm tawh kibang ahi.

Khrista thasang ah Thagau Thiangtho mihingte lak ah nasem dinga guat ahiziakin Thagau Thiangtho panlona kochuam chu masawn ngai puan a. Masawn ngailo kochuam

him him chu thagau lam ah le halthakna nei ngailo puan tiu in, PAthian thilpiak ale tasam intin uh, chuleh kipiakzawna lam ale tasam ahitak ziakun ziagual kochuam chu beltaw kivit hawm tawh kibang ahi. A ziak chu, zia bel ah chun tui tampi sunlut himaleh atawlam kivit hawm ahiziakin a belsung ah tui chu a dim tyhei pua, dim sangin kiamlam manaw jing ahi. Ziagual ah chun kochuam le Thagau Thiangtho a panlo chun khangto sang in khansukna lam /kiamna lam ahisek hi.

Kochuam iti hi political organisation khat le ahiziakin polical thil leh Pathian thu hi khenthiam ding ahi. Ziaziakachun, kochuam leh politics hi kiken theilo ahiziakin khen ding le ahi pua, gawp ding le a hidiak puai. Ahinla, kochuam in diktak leh ginum tak a politics a puilo le politics in kochuam puitheilo ahiziak in kochuam leh politics thu hi lakdan thiam angai hi.

### **Thukhakna:**

Kochuam leh mimal hinkhua ah ThagauThiangtho pawimawna leh pawimaw dan

tam veipi mithiam tamtak in a gentau a, tun le igen ua igen-jel ding ihu. ThagauThiangtho panglo ah gingu hinkhua leh kochuamte umtheilo ding ahi. Tuni'n mimaltin leh kochuamtin in bangziaka ThagauThiangtho neitheilo ihu em? bangziaka kochuam hi khangto theilo ahi diam? ti ngaitua a pawimaw ma ma hi. Tuni hin kochuamtinte vaihawmtu chu mimaltinte hi ihu a. Mimal leh kochuam ah Thagau pawlna ziaka halna daltu hi bang ahem ti ngaitua a pawimaw ma ma hi.

Ziabanah chun, kochuam puitu leh mimaltinte hin eimau mimal leh kochuam te hi i kiethak jel uh a pawimaw hi. I kiet thak jello ua le Pathian ho khalo a mimal ngaidan ahem ahiloleh, kochuam chiadan/system zawk ahem bia/ho khak ding thil lau um tak ahi. Ziakachun, kochuam leh mimal ah Thagau Thiangtho a hunglut a, i nam leh mimal hinkhua chawisang ah a umtheina ding in pangchiat hitiu.

---o0o---

# La thilbawlte chu khangthak zosia'n, gensawn intiu in, la thilbawl nasa takte chu gensawn zel hi'n a

(Sam 145:4)

~Rev. D. Robert Thanga

## Thumapui:

Leichung khawvel ah Pathian gam a dinga I nasep-nau, KhugaSadar Presbytery thasang daltu ding Central KhristianKhanglai Pawl (CKKP) in, Golden Jubilee, Leilon Vaiphei vangkhua, PathianThagau pawlna tawhgual leh pai, kipawlkhawmna hun nawptak a mat ahi. Pathian I pakkhawmnateu, liamtasate vak nungthil kit in, bangkim I bawl zosiate khan lungthim a suthak in, lung a suleng khawpmai hi. Hun chiasa kokit theitalo, I limkha-wmni khuate haw kha, Aw Khanglai chanpite'n vak nungthil kit tiam un.

i). Awle, zia Golden Jubilee I mat lai uh khan bang la gel em?

ii). Pathian thu leh la I ngaithak-teu kha la vawpphat uh a um nalai em?

iii). Pathian kiang a la kipakna ziak ah ginna thutiam la ki-tiamnateu haw kha la he zing nalai em?

Golden Jubilee thupi; Sam 145:4, "**Lalpa thilbawlchu khangthak zosia'n, gen sawn intiu in, la thilbawl nasataktechu gensawn zelhi'n a.**" tigual a khan, bang tiang la maw puakna la

lawtinsak ta em, ahilo le Setan in a lakpiakkhapal tam? Bang din mun in la um em...? Kingaitua thak chiat hitiu.

**Sam bu (pakna late) hi kuate zik ahem?**

Sam bu ziktu hi David, Asaph, Korah chate, Solomon, Heman, Ethan, Mosi, Ezra leh mi dang 49 vel mi chuam chuam a hui ah, zia lak ah chun a ziak tampen chu Lal David hi ahi. David la phuak zosiachu 73 a hi. Tuchung ah Golden Jubilee thupi ding a Sam 145:4 na hi David La ziklak a nunung

pen le ahi. Zia Sam bu a La haw hi 1400 B.C. kipat 430 B.C. sung ah kiphuak ahi. Zia La haw hi Pathian pakna La lehPauchapna La ahi. Zia Sam bu (pakna late) haw hi Bu nga in a kikken ah, bukhatna chu No.1-41 a hia, bu nina chu No. 42-72 chan a hia, bu thumna chu No. 73-89 a hia, bu lina chu 90-106 a hia, a bu ngana chu No. 107-150 ahi.

Sam 145:4

I hiattaksa gual un Sam 145 na hi Pathian lopi dan leh Phatna, Pakna ti'n thupi le kawi ahi (Bible Society of India. David hinPathian nasep lopitak, ama khang ah amu ahi. Deuteronomy 4:9,6:7 ah i mu gual un, Nu leh Pate hawn, la tuteu leh la tusawnteu tiang in hil unla, ti'n la gen ahi. Sam ziaktu hin, Pathian lopi-na, kumtuangpa, hepitu Pathian a hinate, Paktak Pathian a hinate leh kumtuang ah, danglam ngailo Pathian ahidan a muchian in. Jakob 4:14na chun mihing hinkhuati hin la gen ah "Sum chawmcha khat sung a hung zing ah, a mangkit ziang gual bep a hi" ti'n ala gen hi. Pathiana ahile vang, Alpha leh

Omega (bul leh tawp) kumtuang Pathian ahidan a genchian ma ma hi. David in, bang ma ahilo dan aki hiatchian ma ma ziak in, Pathian lopina achung ah a latsakzaw thei ahi.

Khang chia tasate a et inle, Pathian chu ala um zing ah, a hun mat zing laite a en ah, Pathian chu a lopina taw ala um zing tho ah, hun hung tungkit ding ale, Pathian chu a lopina taw um zing ding a hi ti amuchian ahi. Pathian chu kumtuang Pa, danglam ngailo ahidan a taklang ahi. Sam. 22:30 achun, "Suan zosia kiang ah Lalpa thu chu gensawn hin tin, khangthakte'n Lalpa nasem in au" ti'n ala gen hi. Ziaziakchun, Pathian hepina chang in CKKP Golden Jubilee Lalpa'n hepina zalin kipak takmai in mangzo theita, puitu masate'n amau hun a, gim leh chawl genlo a, gaw nuai, daikai nuai ah Lalpa na ginum takmai ah alasepnteu gasua in, tuni hun lopi takmai i tungthei tau ahi.

I puitu masate'n chanchinpha alagensawn uh, Central Khristian Khanglai Pawl mangcha, kipak takmai a, Pathian lopinate, danglam

ngailo leh kumtuang Pathian na alasepnau hun uh chu a liam ta, tuhun ahin, nang leh kei liangko in ahung kinga tha tai. Zia chanchinpha gensawna chu, i mawpuaknau ahi, semzawm ding in, khangthak ten khapetzen ah pan ilak uh ngai ahi. Lalpa apat malzawlna i dawn-teu, lekhathiamna kawngate, khutthiamnate leh kawngchuam chuam ah ei malzawl nate hi, Ama lopina puanzakna ah mang ding in i kichial uh ahi.

Tuhun ahin nang leh kei i um ziakun, Pathian in Van ah mite leh Vang sawlchak tam takte, a chanchinpha puangzak ut ma leule, hung sawllo in, a ziakchu, nang leh kei i um ziak uh ahi pen hi. Ka khanglai chanpite'n tuhun Pathian ei pui tung hi aziak a um ahi. Matthai 28:19 achun, "chia unla, nam zosiachu ka nungzui ding in hun siam un" ti ahi. Zia thupiak chanchinpha nasepna lam a, tusang a hatzaw sem ah pan la ah, lungthim leh taksa lam ah theitawp sua a, nasem ding in i kichial nawn nawn uh ahi.

### **Thukhakna:**

Awle, Khanglai chanpite, CKKP Golden Jubilee chu

taksa leh Thagau ah lawk tak ah i matchiat uh ka gingcha ahi. Jubilee mat hung lai ah mimal tin; la kitiamnateu, supiting dinga, a diak a ginna thutiam ikitiamnateu mimal tin in, i piakzel danteu kha, ka la hiat in Pathian kiang in tam vei tak, kipak thu ka la gen zing sek hi. Zia ban in, khawmpi hun ah thupukna i la bawl uh, Mission field work camp nei ding haw bang supiting theita ding a pan i lak danteu, Income Generating Project (IGP) Jubilee veng a sa pan thei tading a, In foundation chaw pat ahitak dan vak hiat in kipak um akisa ma ma hi. I khawmpi thupi, Sam 145:4 pansan ah i Central Khristian Khanglai Pawl (CKKP) in, zia Jubilee mat nau pat hin Pathian chanchinpha hatzaw sem a gensawn zelthei ding in i kitilkhonau Lalpa'n ei malsawm piak a, atak ah i septhei ziak un a lopi takzet ahi. Pathian Lalgam kek lenzel thei ding in, Lalpa'n ei malsawm chiat tau hen.

---o0o---

## LALGAM NASEMTE LEH THAGAU LAM PUITE LAWSAP THEINATE

~Rev. Dr. Hangpi Manlun.

### 1). Thumapui.

Awle, tuni-i ngaitua khawm ding uh ahile, Pathian nasemte/lawi-upa dinga pawimawte ahi. Chuleh, vangsiat umtak lalgam nasemte/lawiu-pa tamtak le tu-ah, i gendingte'u, ala puksia, nidanglai a thupi tak tak a kimang tamtak le mattheilo in a umzo tau, ei uh leh i pilvanglo leh melmapa Setan in ei thempuk thei zing ahi ti hiatmillo ding ahi.

A diakin tulai kochuamte leh a sunga semte Thagau lam nasepna mun ahilam hemil in taksa lam kipawlina gual a ngai ziang le a kitamta ahi. Ziaziak achun, thugentu khatin, "tulai Kochumte ka en a, khawvel ka mu'i, khawvel ka en a, kochuam kamu'i" ati gual dinmun ah kium abangta ahi. Agen nawpen chu khawvel leh kochuam i kibatsak tau. Longpi chu tuichung a tai ding a siam ahi, ahin a kek a, tui asung a alut leh sawtlo kalin tuipei sung ah atum mang ta ahi. Zia gual

machun kochuamte leh khawvel a um ihu a, khawvel thu leh vaihawmnate'n, ei lua khak phatleh isia un mangthai ding ihu ti hi hiatmillo ding ahi..

**2).Thagau lam lawi-Upate ading a thil lau umleh kiven-na ding a kul-leh-pawimawte ahileh, Sappau-in 'W-3' (thum), 'P-2' (Ni), leh 'Billy Graham Rule' a kigente gending ihu. Ziate chu ahileh:**

**2.i). Wine, (Zu-le-sa) ahi.**

Zia hi ahileh Bible in leh a hagen ma ma ahi. Tulai melma Setan in mi a thepna khat ahi.Mi nautangte gentaklo a Pastor leh Upa tamtakte le zia zu-leh-sa ah kidek zolo i tamta ma ma u a. Zia guala chun, thepna tuakte Daniel leh a lawite, lengpa An, zu-leh-sa ne ding a thu piak ahi lai un, Pathian launa hinkhua a nei ziak un a kism tinten danteu i ngaitua ua i ettawn ding uh ahi. Ziate sangin 'anche lohingte leh tui sikte peding in adawn ua,' zia gual chun, Pathian in alawi a paitte sang ua pilzaw leh a



damthei zawk ban ua, Daniel vang kha mang letheina le a pia ahi. I gen nawp pen uh chu ahileh thagau puitute puaksi-at theina 'Zu' ahidan ihiatmilo ding uh ahi.

Nidanglai a Rome khawpi thupi leh liantak mai puksiatna kha 'Zu' ziak ma ahi a kiti ahi. Ziabanah, lengpa Belshazar in a lenggam achâna ziak le apa Nebukadnezzar-in Jerusalem biakin ah sana leh dangka no, mi sangkhat ading ankuang a lui lai in 'Zu' dawnna in a mat-thanghuai zia kin a lenggam chu achân lawtai (Daniel 5). Tulai igam ua le Zu-leh-sa nek ziaka, mani hiding tiang hizolo leh gam-leh-lei, In mun Lo mun chân le itamta mamau ahi.

## **2.ii). Wealth, (Sum-le-pai neive utna)**

Tulai midangte nei nei enle nei ding tupna in i pumdin tau ahi. A langkhat lam ah khawvel ngainatna ah i cheng ua. ziaziaakachun, thagau lam a puitute le zia haw lak a pat chun bit chuamlo diaklo in khenkhatte chu nek gukna sal ah tang in, minsiatna leh organization leh kochuam ah

buainate a piangsak khawlo sek uh ahi. Ziaziaakachun, sum-leh-pai ngainatnate lak a kipat a thagau lam puitute ikiven zinglo ua le melmapa Setan in zia hi mangchân minsiatna leh mualphonate ah le ei puimang ding ahi. Thagau lam puitu tamtak puksiatna chu sum-leh-pai dawina leh mani masialna zia kate ahi nuam mama hi. Bangual tuk in thupi in, pil malehin le sum-leh-pai a mi duamte leh huaihapte chu mipiten a het-daw phatle, muanna-leh-tak-sangna a neizo puau a, amau nuai ah kuama a um nuam ngai puau. A damsung un lawi upa lawsam hiding ahiu. Chuleh, adiakin, Lalgam nasemte chu Pathian nasem ding a i kipiak lai un zia leichung sum-le-paite leh nawpsakna dingte nusia a, Pathian nasem ding a kipia leh hatna nei ngen chang ikitiu ua. Ahin, Pathian na i septak le, Israelte Pathian in Mosi mangchan a Aigupta gam nusia a, a chialai un gamthip gam ahung tung phat un, Aigupta gam a, a An nekteu lunggul a phun kit gual un i phun kit jelsek ui. I pikanthak lim ah Pathian nasem dinga i kipiak lai ua ichânte/

taisanteu ah suak-leh-salin itangkit sek ui.

Chuleh , nikhat Thomas Aquinas in, Pope avave (vis-it)-kha a, sum tamtak a lasim a, kisuangla tak mai in, Pu Aquinas, “masang ah nungjuite hun lai guala, sana dangka kanei puai” ti hun hitalo ahi, ati leh aman le “ahima ahi, amau gualin ‘Jesu min in la keng in lamjawt ta’n” iti thei tapuau, atisan dai hi. A umzia chu kochuamte leh Pathian nasemte’n thagau lam ah i power uh i mansua tau, tina ahimai hi.

### **2.iii). Women (Sex, Nu-le-pan lam a kidekzawlona).**

Tulai melma Setan in le minautangte bep hilo in Pathian nasemtute thepna dinga vanmat lopi tak khat numei leh pawсал thanghuaina(sex) ah kisumzawlona ahi. Ziaziaka hin, leichung ah Pathian nasem lopi taktak maite a lapuk uh ahi. Ziakachun, lagam nasemte Satan thanga ah i awklona dingun pilvang hitiu.

Tulai, technology a san tawh kitawn in, bailam tak a nu-leh-pan (sex) lam a thanghuainate muthei ding atam ma ma tai. Dr. Billy Graham

in, “Tulai leichung hi numei-leh-pawсал thanghuaina ah tum mang ding i hitau” ati dinmun in i dingtau. Chuleh, ‘Sodom leh Gomorrah’-te pusiатna le zia sex a thanghuaina ma hi ahi. Zia guala sualna ituak phat uh le Joseph kha geldawk jing hitiu. Aman, zia gual sualna hi Bible kijik masang inle ala do zo ahi. A langkhat lam ah, leichung pumpi a mihat pen hiding a, Pathian in a belguat leh a maljawl, Pu. Samson pukna sex ma hi ahi. Ziakachun, Joseph in sex mun kha ala taisan a, Pathian in Aigupta gam ah Governor tiang in a dawmsang ahi. Alangkhat lamah, Samson in nungak Delailah malpi chung (gitlona mun)-taisano a, a kualpi tak ziakin, a hatna thugukte gendawkin, ahatna zosia bailam tak a lakpiak in a um a, atawp ah a mit pani kheldaw piak in a um hi. Leichung a mihatpa chu sex ah a kidekzo taklo ziakin, naupangte kihelna in apang a, thi hunlopi in a thilawta ahi. Ziakachun, ei lalgam nasemte leh lamkaite le sex ah i kidekzaw ua, i pilvanglo uh chun dan le puk in mualpho kha hitiu.

Masanglai in, lawite tawh ka holimna un, zia gual hhin tawt bawlna kawm in a gen ui, “Pastor leh Lalgam nasemte chu tuipi chungte, thingkungte, gari chungte leh kawl sang taktakte ah kepuan tui in, ahin bangtik lai-inle a khiatthak theina zing uh ahi leh lupna (bed)-chung ahi” a tui ahi.

**3). Awle, Setan vanmat ‘W’-thumte igenzo tau a, tuhin ahileh, ‘P’-(2)-nite gen kit ding ihu.**

**3.i). *Pride/Proudness (Kiletsakna leh minthan utnate.***

Pathian nasemte leh thagau lam puitu vaihawmte’n thepna ituak theinau ahileh midang sang a bawlthei zaw hi utnate, genthei/vaihawmthei kisaknate, semthei/bawlthei kisaknate, pilzaw leh chungnun utnate ahinuam ma ma ahi. Zia kiletsakna hi Dawimangpa Setan puksiatna leh kiatna ahilam i hetmillo ding uh ahi. Chuleh, Pathian nasemte leh lamkaite chu Dawimangpa khiat thakna mun a khetha zing i hilam i kihetmillo dinguh ahi.

Tulai, mite hi taksa-leh-thagau ah khantona leh ma-

sawnnate i dawmsang deudeu ua, i kiletsak un i chapo deudeu u’i. Proverb-in, “Kiletsakna chu mangthaina masang in a chia hi” ati hi. Pu John Newton chun, “Chapona/kiletsakna chu kochuam melma/gal lian pen” ahi ati ahi. Chuleh, Pathian in le mihingte laka, a dawpsang theilote chu kuate ahiu em, i ti leh mi kiletsakte ahiu. A ziak ahileh, Pathian in amau chu a dawpsan masangin, ala kiletsak ua, tichun dawpsang theilo ding in, a khetha suk ngal mai un.

Ziakachun, leichung a Pathian mimatte leh lamkaite chu kuama a kiletsak ala um puau, tichun Pathian inle ala dawm sang deudeu hi. Saint, Mother Teresa (1910-1997), ‘Missionaries of Charity’-te lamkainu kha sister dangte tawh a kicheina a kibang hi. Calcutta a, a munpi uh ‘Mother House’ a kikhawpna a neisin un tuangchung ah a kichu dim diam ua, ama chu a nunungpen ah bâng ah kingam kawm in a chu zel hi a kiti ahi. Aman, a damsung a, thilthupi abawlte chu “Kei bangma ka hipua, Pathian khut sung a pencil gual

bep ka hia, ka thilbawl zosia chu lekha ziktu'n a khut ah pencil mangcha thiltamtak a jik gual a, ka nasepte zosia Pathian in a bawl/jik ahi" ati ahi. Pu Willaim Carey, ngei in le a damsung a thil thupi tamtak a bawl lai in, "A thi ding kuan in kei ei gen pha kiu inla Pathian chawihawi un" ti'n a gen hi.

Chuleh, tunai a khawvel pumpi a 'Super Power' chawitu leh gam zosian a ngaisang leh chung et pen USA- President Pu. Donald Trump in, President ahinate leh ahausaknate chu suantak ahilo dan agenna ah, "Kei US President ka hi ziakin ka kiletsakpi ding bangma a um puai, aziak chu kei masang in mitamtak US-president in alapangzo tau a/ala umzo tau a, kei amau sepsate sun zawmtu ka hibep hi, a ti ahi. Ziabanah, Donald trump hi US gam ah mihausa tak mai ahia, a hausatnate le kei masang a mihausazaw tampi a um tau , kei hi amau nung a hung hausa bep ka hi, ati ahi. "Kiletsakpi ding a um pua, thil zosia Pathian ziak ahi" ti thu a gen chun mi lungthim a khawi mama ahi. Ei lawi tawh kikhia mama ahi

maw!

Puitu masate a lawtin- nau thuguk uh ahileh a kingai niamna ziak uh ahi, ti Bible in i muthei ui. Aziakchu, Pathian in a kingainiamte a chawisang in adawm sang ahi (Phil 2:5-11). Baptistpa Johan thiltup kha Khrista a let sem sem a, ama a neu deudeu ding ti ahi (Johan 3:30). Mosi leichung mihing lak lak a thunuai gawl pen leh nunnem pen le a kiti ahi (Kisimnabu 12:3). Sawlchak Paul testimony i sim leh Sawlchakte lak a neupen (I Kor. 15:9), mithiangtho zosia laka a neupen sang a neuzaw (Eph.3:8), leh migilo laka migilopen (1 Tim.1:15) guala akigenna thu i mu'u ahi. Zia gual ah kingainiamna ziaka chun nasa tak in chawisang ahui hi.

### **3.ii). Power (Thuneina matkhialna).**

Zia thu hile a chung ah tawh kinai ma ma ahi. Tulai a, Lalgam nasemte leh puitute puksiatna, mi demna leh dawilona i chan theina ziak uh ahileh zia thuneina matkhialna hi ahi. Sappau a 'corruption' kiti khu sum-le-pai nekgukna maimai ahi pua, thuneina mat-

khialna le ‘corruption’ chi khat ahilam ihiatmillo ding uh ahi. Adiak in, Lalgam nasemte chu Jesu Khrist sep ban sem ding a, suak nasem hilai in, khawvel mite gual ah i nasemna mun uh chu letna, lalna, kithuneisakna mun ah i ngai ua, aneupen hi kichu dingte i hilai ua, nungzuite gual ah kua ahem lianpen ding ti ah let-leh-lal kichuna mun a bangta ahi.

Ziabanah, vaihawmna mun a chute le i chutna mun uh chu Lalgam nasepna leh a Lalgam kekletna ding ahilai in, mawpuakna i tuklam lam thupi taka gel in mani kichawisangna dingte, mani thu bep chia-sak guat tintennate, thuneinate matkhial leh mite mudatheina ding nasep a bailam mama hi. Ziakachun, i chutna mun chu mani thu thu a vaihawmna mun ding hilo in, Lalgam kekletna ding leh Pathian min chawisangna nasepnate’n mangchi-at hitiu.

Baptisttu Johan ngei kha le ahun lai in mite’n Messia hi ding in a gingchau a, aman kei hi “Messiah kengtaw khau suttak le ka hipuai” ati ahi. Tichun, zia gual ah Jesu lopina

a piak ziak in Jesu’n lopi tak in a chawisang ahi “Numei suan a piang lak lak ah baptisttu Johan a thupi pen hi” ati ahi. Ziabanah, Thuthungthak lekhabu laka Marka lekhabu a kijiik masapen a, ahinla kuama’n a masapen ahilam a gen kha puai. Ahin, tulai ahin Bible thiamte’n Chanchinpha bu dangte sang a Marka jik hi amasapen ahin, chanchinpha bu dangte’n Marka zik apat ahin a laksawn uh ahi dan a umudawk u’i. Mit-en hephalo maleu Pathian in a dawmsang tho tho ahi. Pu. Sadhu Sunder Singh in, “gin umtak a Khross dawmsang zingte chu nikhat ni le Khross in amanu/pa chu a damsang kit ding ahi” a ti hi a dik ma ma mai hi.

Masanglai a China-te lamkai lian khat Wuchi kiti khat in a ‘sepaite an nek gual gual a ne, puan le amau sil gual gual a sil hi” akiti ahi. A man a sun an ding a kipuak a, a sepaite tawh gim leh chawl a thuak khawm a, zia chu lawtinna thuguk ahi, a kiti hi.

4). (L). Rev. Dr. Billy Graham lawtinna thugukte leh Rules-te ettawnin nei kit hitiu.

Awle, (L) Dr. Billy Graham,

lawtinna thuguk leh Rules-te keima mimal suidan leh News in agente apat in sui hitiu. I hi-atsau gual in, ama kha tukhang a ding a, Pathian mimat pen leh mitampi mai ah thugen tampen inle tepte ahi.

Achiasa October 24, 1948, in Billy Graham (30), leh a lawmte, George Beverly Shea, (39), Grady Wilson, (29)-ten Modesto, California ah chialpina a nei ua, South Ninth Street Hotel khat ah a giak sek ui. Amau chun, Lalgam na a sepnau (Evangelism)-a, thepna leh buaina atuaklona ding un dan (rules)-zui ding a bawl ua, ziate chu ahileh;

#### **4.i). Sum-le-pai ah diktat ding ahi.**

Sum-leh pai a diktat ding, sum a mu dan dan uh chu amatna ding le kichiantak in a um sak ui. A sum muteu chu amau in sailo in midangte saisak ding leh chialpina zosia a, ahithe chan a, a budget bawl uh tawh kiningting sak hamham ding ti ahi.

#### **4.ii). Numei-leh-pawsal kal hindan thiangtho ding.**

Pathian thugena sawtpipi zin thei ahiziak un, thep-

na a tuaklona ding un, numei tawh amau ngawn a umkha-wmlo mawng mawng ding ti ahi. A kigen bena ah chun Billy Graham-in, numeite counselling biakinn sung ahiloleh Insung a abawl phat le, kawt-leh-tukver (window)-te ahawng tei tei a, chuleh a sepkhawmpi numeite tawh room khat ah a chu nuam puai. Ziabanah, alotheilo ah a seppi, a diak a numeite vathak (drop)-a pawimaw tâk inle ama chau in a ut puan, mi khat tawh avathak teitei sek hi a kiti'i.

#### **4.iii). Kochuam tawh sepkhawm thiam ding.**

Amau chun a ngaikhawk ma ma kit uh chu ahile a vachiana kochuamte tawh kituak tak a Pathian na sepkhawm ding ti ahi. A vachianau tualsung kochuam ah sem pastorte, upate chu vagense mailo in chanchinpha hawi taka gen ding tichu angai pawimaw uh ahi. Zialo ah chun, kochuam leh kochuam puitute muniam leh simmaw thei dinga thugen leh lasak le neilo ham ham ding ti ahi kit hi.

#### **4.iv) Mani-leh-mani kiphat leh aval a kigen hawilo ding.**

Alina leh tawpna pen dingin, a nasep uh leh a sep-dawteu chu midangte hiat ding ti ah a thugennau ah pi-angthak zat, camp/crusade ah pangthei zat haw gen vel vello ding leh mani kigen phat vel vello ding ti ahi. Zia gual hi mi khenkhatte'n demna'n nei maleu tam takin hawi a sakpi tho ui. Atawp lamin, 'Billy Graham Rules' tihial in ahung umta ahi.

A chung ah 'Billy Graham's Rules' li (4)-te hi Pathian nase-mte bep hilo a Politician-te'n, le a hung ngaisang un a hung entawn tau ahi. Chuleh, zia dan lite hi US Vice President Mike Pence in, tu masang deu ah a hung gendawna apat ah hung kithang daw kit ahi, akiti. Chun, Mississippi Governor candidates mi-ni (2)-te'n le a zuidan uh leh a zui guat dan-teu a gen baw u'i. Ziate chu ahileh:

**i). Robert Foster.**

US Republican governor candidate in le zia dante chu a zui guatna ziak ahileh a nasepna mun zosia ah a ji hilo numei dang tawh amau bep a umlo ding, aziak chu a ji ama a

ding a mantam ahidan a suklat a ut ziak leh numei a gin umdan a gen utna ziaakte le ahi.

ii). Bill Waller, Jr.-in, a genna ah kum 22-sung US ah 'Supreme Court Chief Justice', a sepsung in le numei tawh room khat sung a umkhawm ngailo ahidan "Mississippi Today" tawh a holimna un a gen hi. Numei tawh um khawmlo a, kisuthiangtho a umzing ding ahidan agen hi. Mi politiciante'n zia gual ah thiangthona leh kiveng bitna dinga pan alak lai un bang gual tuk a Lalgam nasemte'n panla'n i pilvang uh ahem tih i ngaitua ding uh ahi.

**5).Thutawpna.**

Awle, u-leh-nau haw, a chung ah i genteu hi ei Pathian nasemte leh puite'n i hinkhua ua i nei nau em ti eima-leh-eima ki-enchian kit hitiu. A diktakin, genta mailen zia a chung a i genteu apat i kikawi thiangtho zolo uh ahile banggual in ko-chuam puitu kahi tileu hinle alawsam kihi tho tho ding ahi. La hinkhua ah ziate kipat ah kiveng zo dingin Lalpan hung malzawl ta hen.!!!

---o0o---

# THAGAU THIANGTHO

~Evan.T.L.Mang Vaiphei

*Genpiaktu Thagau Thiangtho ngei chu ka min in Pa'n hun swwl intin, ama chun thil bangkim hun hil intin, la kiang ua ka thugen zosia hi hun hetdaw sak kit ding a hi. Jn.14:16.*

## Thumasa:

Thagau Thiangtho kiti thupi a mang in tamlo vak suikhawm hitiu.

Thagau Thiangtho hi Pathian ah mi pathumte lak ah pakhat a hi. Mihingte gual ah hinna leh hetna nei ah gen a hi. Hun chiasa ah Bible lettu khenkhat te'n Ama Thagau Thiangtho hina a hetchian lo jjak un, a Bible le natiang un a la let khial ua gen in a um hial a hi.

## Thagau Thiangtho chu kua a hem?:

Thagau Thiangtho chu Pathian ah mi pathumte lak ah pakhat a hia, Pathian bukim leh Pathian tawh kikhen thei-lo Pathian a hi (Nas.5:3-4). Tu thuthung thak hun bep ah kilang hilo in, thuthung lui hunlai in le a nasep a kilang ta a hi. Himaleh, thuthunglui leh thuthung thak hun ah gingtute chung ah a nasep dan a kibang puai. Thuthung lui hun in, gingtute **Thuatmu** in a pang sek ah, maleh a umpi den ngai puai. Himaleh, thuthung thak hun a hin Jesu'n a nungzuite kiang

ah a thutiam gual in Penticos ni hung tung in gingtu mimal tinte ei chenchil ta a hi. **Nangmau hi Pathian chenna in leh Thagau Thiangtho chenna in la hiu ti helo la hiu em?** I Kor. 3:16. I taksau hi Pathian Thagau chenna in a hi.

## Thagau Thiangtho Pathian a hina:

# Thagau thiangtho chu bangkim hesuaktu a hi\_ (Ps. 139:1-6; I Kor.2:11)

# Thagau thiangtho chu muntin ah um a hi\_ (Ps.139:7-10)

# Thagau thiangtho chu bangkim bawl thei a hi\_ Ps. Job.33:4; Ps.139:13-16).



Zia a chung ah i gen point pathumte hi Thagau thi-angtho Pathian a hina a sudet a hi.

**Mihingte chung ah Thagau Thiangtho nasep bang a hem?:**

Thagau Thiangtho in Pathian dawigual Jesu Khrista'n a sep bukim takte chu mihing leh gingtute hinkhua sulang ding leh sudik ding ah mawpuakna leh thilhitheina nei a hi. Piangthak, Pathian cha hina diktakte chu a pianthak hun ua kipat kumtuang tiang a ding in Thagau thiangtho in ei chenchil in ei puihuai ta a hi. Thagau thiangtho nasepe chu - **Ama ging mite hinkhua a nasep:**

Thagau thiangtho in lam chuam chuam in na a sem a, a nasep dan sut zolo ding i hi jgak un, a nasep dan jat chuam chuam tamlo cha cha'n vak en hitiu.

# *Pathian tawh i kizawpnau ei hiatsak hi\_ I Jn.3:24.*

# *I nisin hinkhua lamdik ei hil a hi\_ Rom 8:14.*

# *Pathian dawigual hinkhua i mat theina ding ah ei puitu a hi\_ Gal. 5:16.*

# *Pathian kiang ah i sik ua ei genpiaktu gin-um a hi. Jn.14:26.*

# *I pauchapna hinkhua ei panpitu a hi. Rom 8:26.*

# *Gitlona ei hetsaktu leh thamuantu a hi\_ Jn.16:13.*

**Gingtute nasepna tawh kisai ah a nasep**

***Gingtute'n a nasepna tawh kisai ah Thagau thiangtho nasep bikte chu***

# *Gingtute chu hatna leh hang-sanna ei pia a hi. Nas.1:8.*

# *Gingtute kiang in Thagau thiangtho nasep ei hetsak hi. I Kor. 12:4, 8-10*

# *Pathian thu thutak het theina ei piai. I Kor. 2:9-10.*

# *Pathian biak dan dik ei zilsak hi. Eph.5:18-19.*

**Piangthak lote hinna Thagau Thiangtho nasep:**

Mihingte hi mi gilo i hin- nau ei hetsak hutu a hina i Bi- ble in ei hil a hi. Gitlo i hin- au kihetna bep hilo in, Jesu Khrista ginna jgak ah hukdam kihatchi- anna nei ding ah ei puitu leh ei nei saktu a hi. Migilo khat, gilo i hin- au hechian ah simna tawh Khrista ah hing ding ah ei puitu chu Thagau thiangtho a hi. Jia bep chu hilo in, tatna ni ding ah

Thagau thiangtho ah tepte in i um uh a hi.

Jia khel lam a chun, Gingtu:

# *Thagau Thiangtho thunun leh puihuai ah um zingte chu: Thagau ah dim in a um ui\_ Lk. 1:41,46; Nas. 2:4; 4:8 etc.*

# *Pathian a ding ah matchak ding in, piangthak dik takte chu Thagau thilpiak chuam chuam ei pia a hi. Piangthak Thagau thilpiak changlo ti a um thei puai. Chun, i thilpiak chan uh vang a kibanglo a hi\_ Eph.4:11-16; Rom 12: 3-8.*

### **Tulai gingtute leh Thagau Thiangtho:**

Tulai gingtu tam tak in Thagau thiangtho tawh kisai a i ngaidan uh leh i pawm dan khenkhat teu hi i Bible ei zilsakna tawh kilebul a bang hi. Khrista ah hukdamna kichian tak nei ding tup ah nei masa lo in, a Thagau thiangtho chan ding a hem, lim ding a hem, chawp ding a hem, hi i buaipi masa jaw'u a bang hi. Piangthak lo ah Thagau lam limna bep i buaipi phat leh kochuam a ding ah hiselna sang in hisellona a hi nuam hi. Hun khat ah Thagau chan ding hilo in, piangthak diktakte chu

Thagau Thiangtho chenchilna (indwelling of the Holy spirit) changtute i hi tak jiaq un, kumtuang dai a hi. Khatvei kikhawpna Thagau chan ah bei kit mai ding hilo, tatna ni a ding tiang ah Thagau thi-angtho ah teptena changte i hi tau a hi ti i hetmil lo ding a hi. Pathian cha hina diktak neitute chu hun khat thu hilo in, nisin hinkhua in Thagau thiangtho puihuaina tawh kal i suan jaw ding uh a hi. Lim hitiu, kipak hitiu, kichawm hitiu, a hi ding ma a hi. Himaleh, i lima thuguk, i kipakna thuguk, i kichawpna thuguk chu Khrista ah hukdam (pi-angthak) i hina jiaq uh a hi ding a hi jaw'i. Himaleh, gingtute Thagau thiangtho tawh kisai ah i pilvanna ding uh a um hi. Jia chu, *Ama Thagau thiangtho i suklungngai lo ding uh a hi* (Eph. 4:30). Thagau thiangtho ngawl bawl puai tiu, ama hi Pathian a hi. *Chunglam a kipat hung suk Thagau thiangtho chu a pil a, kicham a nuam a hi.* Thagau a dim, Thagau chang zing ngal a, midang tawh kicham thei lo, khang thei lo i hui chun, hukdamna tawh kisai ah i kibulphunau i et thak kit ngai

ding a hi. *Thagau ah hing i hiu chun, Thagau ma ma'n kalsuan hitiu. Gal.5:25.* Thagau ah hing, Thagau ah kalsuan theilo gingu i tam takluat jgak un, i gingu hinkhuau a khang thei lo a hi. Gingu mimal hinkhua a khang thei puai.

Thagau ah dim ah, Thagau ah kalsuan ah, Pathian dawigual ah hing ding in, kisa

thak hitiu.

### **Thutawp:**

Thagau thiangtho hina hechian a, i nisin hinkhuau eimau dawidan hilo a, ama Thagau thiangtho dawidan hawl a zui ding in kisai tiu in, mi Thagau thiangtho puihuai ah um tapo Pathian chate a hiu ti hia'n la, nangma dawidan nusia in, ama puihuaina khut nuai in puklut in.

---o0o---

## **BIBLE SUNGA IMU MI PANGA(5) TE APAT ZILDI**

*~P.T Khoma*

### **1. Noah:**

Tuisang let zaw akhan, Noah chun lo abawl a, Grep a ching ta ahi, ti chun a grep ching te chu aga phat in grep tui chu a suk a, a grep tui chu uain in asiam ah, a dawn sek ahi, nikhat chu a hung kham ta, zia phat a chun a hung ipmut lai a chun ala lum soal kha ta ahi. A lup soal laitak chu achate laka "HAM" (Kanaante Pa) kiti pa hin ahung mukha ta, bangma law lo in a

unau dangte kiangin ava gen ta ziaphat a chun "Shem, Japhet" chun puan the khat zawn in lelam ngan kinung chawn kawm in a pau lum soal chu ava khu tau ahi. Noah chu ahung khatlaw phat in thil umdan zosia chu a hung heta'n zia phat achun hitin ahung gen a "Kanaan chu hansia law in um hen la, A suapite suak niampen in hung um hen," tin ahung gen ahi. Genesis 9:18-25.

### **2. Abraham:**

Pathian in Abram kiang in thuthung a siam lai a chun, Abram in Lalpa kiang in zia chu bangtin hithei ding ahem tia a dawnhu lai in, Pathianin Abram kiang in Bawng la, kelpi; Belâmchal khat chiat kumthum a upa leh vakhu leh vapal khat gel hung la khawm inla, tichun vachate tilo gancha kengli neite zosia kha akim in phelsua chiat in, vacha sahing nete lak in veng in atia, tichun Abram inle a veng zing lai a chun a hiatlo kalin ala ipmut san khata ahi. Ziaphatchun Pathian in Abram kiang in La suan te chu Amau gam hilo in migam in malzin in hung um intiu in Kum zali zen genthei takin mina hung sem in'au tin a gen ngal ahi. Gen. 15:9-13. Khatvei Pathian thulo a vak ipmut khak mai inle a zel sau ngei maw...

### 3. Jonah:

Amitai Chapa Jonah kiang in Pathian thu hungtung in Neneveh te kianga chanchinpha vagen ding in sawl in a um ta. Ziaphatchun Jonah chu nuam lo in zamang a gawta, Tarshish lam zuan in Lawngin a chuang ta, Lawnga a kitawl zing lai un

Pathian thigawpi thakhat in a hung hang phut ta; ahat mama zianga, zia laitak a chun Jonah chu ipmu ala hi, Lawng pute chu a lau thawng mama ziang tau a, mitin in a Pathian chiat uh ako ua la, apha chuam diak puai. Lawng zangkhaina ding ti in a van hawi lai lai uh a giksak deu deu haw chu tuipi lak in a sep tha zung zung ziang tau a. Ahinla a pha chuam diak ta pua, mipi buai veng vung laitaka chun, Jonah lawng sunggil lam a ipmut tuitak a ipmu chu a hung mu tau ah, Lawng pute chun, "Aw nang ipmut thutpa tho inla la Pathian ko in I mangthai lo na ding un" ti'n ahung phawng tau a. Jonah chule ahung thaw phatin, thil bangkim a chung ua tung chu, keima ziak ahi tin a hung gen dawk tai, A leh bang ka hung law diam uh ati lai un, Tuisua-giat lai in ei seplut leuchin pha mai ding ahi tin ahung gen ta. A tigual ngei a chun a hung bawl ua ahileh, thigawpi leh tuifawn chu a hung thip ta ahi. Jonah 1:1-17.

Jonah Pathian thu zam-san ah a ipmut ziakin Lawng chuang mi bangjat hem in, a nei leh lam uh tampi a matsua

khawlawu ah, a hinnau nati-ang le a matsua khawlaw vang hial uh ahi.

#### 4. Jesu:

Jesu leh a nungzuite dil chungu kuang ah a kitawl lai un, Jesu chu kuang meilam a chun ala ipmu ta, zia lai taka chun, thigawpi chu tha khat in a hung hang phuta, nungzuite chu a buai mama ziang tau a, thigawpi chula hai diaklo in kuang chu le mut khup vang vang khawp ah a um zing lai in, Jesus chu kuang meilam in ipmut tuitak a ipmu chu a va-phawng khawng tau ahi, “Lalpa, ei hukhing in tum mang ding ka tau hila,” tin ala phawng tau ahi. Ziaphatchun Jesu le hung tho in, thigawpi chu ahung vau thip pai ngal ta ahi. Nungzuite chun mak asa thei mama ahi. Tichun damtak in gal langkhat chu akai tau ahi. Matthew 8:23-27.

#### 5. Sawlchak Paul:

Sawlchak Paul in Troas a tawna nunungpen, a jing in Mikta lam ah chia theng ding ahitak zia a chun zansawt lam chan Pathian thu agen ta, kikhawpna le a sawt tak zia le hi ding ahia. Amin ‘EUTIKAS’ kitipa hi ala ipmu kha ta, tukvan gei a kitung ahi zia kin

insawng chung apat chun ala vuang tha ta ahi. A thisa’n a luang chu ava phawng tau a himaleh, Paul in a pauchap leh hinna a hung nei kit tan, tichung dam leh kipak tak in akilekit thei ta ahi. Nasepte 20:9-12.

#### Thutawpna:

Zia a chanchin chawm cha cha hung kigente haw hi Bible ah kimu ngawn ahia ah, chawm cha kal bep a ipmut zia un, thilsia leh thilkhaw tak tak a tun khawlaw ziang ahi. Zia guala chun nang leh kei le bang gual in I um em, dawtna Pathum vak en zawm hitiu.

1. I bialsunga kochuamte ipmut san mai ihi kha em?
2. Kochuam sunga, I belamte ipmut san mai ihi kha diam?
3. I insunga izi ichate thagau lam a ipmut san mai pa ihi em?

Zia dawtna pathumte hi kuaman i pum pel theilo ahiziakin mani lungthim chiat ki dawn hu in, khat lawna’n mang chiat hitiu.

“Tulai hun um dante hi hian ipmu laite din thaw hal a hun tai. Lalpa’n simtute zosia phatchuampi thei chiat ding in ei malsawm piak ta hen.

---o0o---

## TULAI THIL UM DANTE HIAI IN, IPMULAITE THAWHAL A HUN TAK ZET TAI

~*Mr. Benmuan  
Inglongpo Mission School, Longnit  
Karbi Anglong.*

### Thumapui:

**I** gam Christian i hinau sawtpi hita maleh Pathian thu hin vang ei siam dikjo ma ma lo hi ding ahi, i gam dinmun i et veng veng ahi chun, a diakin kochuam sung nasan ahin buaina kiselgu a tam ma ma hi. Hotu hi ding ki chu, kochuam upa hi ut vote tawm mu munpen, upa tel ding phawt le vote hawl, thawlawn thaw tam thei deu jiaka kochuam mawk thu nei khum gua, pui-tu masate ja na um talo, kochuam hi political party guala ngai, kochuam sum la dik taka audit theilo tam ma ma jiang, a belum etkawlte la gawng deu deu uh (thagau lama dangchak tam pi um), SBI a semte guala kochuam puitu ho hak ma m a la ki tam, Pathianni nasan a kikhawm di tawm deu deu...gen ding atam hi.

Zia guala masawnlo a, Christian min pu mai a i lungawi kal un, Hindu ten i sakhua suksiat gua, thiam taka pan lak dan vak en suk leu hin ka nuam hi. Thagau lam a i ipmut nau a pat i hal daw thei khak uh le pha ma ma ding ahi.

### I. SUKGENTHEINA ANASAT TO DAN:

Tuma lam akhan suk-gentheina hi um sek maleh tunai a gual lawm lawm hin a tung jing puai. Kum 1964-1996, kum 32 sung khan Khristiante chung a haksatna tung tepte thei chu 38 vel chau ahi. Kum 1997 apat in mak tak mai in ahung khang to, zia kum khat sungchau ahin thawkna 24 vei

a tung man hi.1998 a vang vang hin 90 vei a tung hi. Suk-gentheina thawm chawlo in a chia jing hi. All India Christian Council chun kum 2016 akhan India gam ah dakkal 40 zel dana thawk na atung hi atiu.

Violence Against Christian in India (Wikipedia) chun pawl chuam chuamte'n haksatna a tuak dan uh ala tepte dan zia gual hi ahi.

**a) Evangelical Fellowship of India (EFI):**

Zia pawlte'n hin a tepte dan un kum 2015 a khan India gama Kristian chung a thiltung case chuam chuam 177 report ahin, 2016 a vang vang hin 300 hial report ahi.

**b) US Commission on International Religious Freedom (US-CIRF) :**

2017 kum ah a zilchian nau ah chun India hi khawvel ah Khristiante sukgentheina nasa pen pente ban um in (Tier 2). Iraq leh Afghanistan te tawh huang khat in a kaw ui.

**c) Open Doors' World Watch List :**

Zia pawlte zilchianna ah chun, India hi sangtak ahiu, Khristian sukgentheina lam in, kum guk chiata ah 31na kha tu ahin 11na ahi tau.

**II. SUKGENTHEI NA TUN DAN TANGPI:**

**a) Thagum suana :**

Sukgentheina tuna ahin thagum suana ahi tangpi sek hi, zia hi mimal leh pawl chungin a tung sek hi. Lok Sabha dawtna leh Dawnhuna (vide unstarred

question No. 590 for 6-2-2018) akhan ti gual hin aki mui.

Kum	Thagum suana	Hinna chanzat	Liam zat
2013	823	133	2269
2014	644	95	1921
2015	751	97	2264
2016	703	86	2321
2017	822	111	2384
Total	3743	522	11159

Mihingpite chung a thil tung dinga chun a nasa ma ma in, mun khenkhat ah chun Hindute'n kikhawm theilo dinga vau in, pastor leh kochuam pui-tu kikhawm di a phal puau.

Tigual a kikhawm di phallo hi mi 20/30 (a hawna) vel ahi sek ui. Hindu leh Police te pangkhawma thil bawl ahisek jiakun, Court lam tangko in um jia anei ngai puai.

**b) Sakhua teptena suksiatna :**

Kristiante hi tam vei tak sakhua teptena (Symbolic violence) manga sawisak i hiu. Tigual thiltung ahin Biakin leh a sunga thil um tam tak suksiat ahi sek hi. India khawpi, Delhi a tigual thil hi atung mun ma ma in, khawpi dang danga le

thil tung hi hiat ahi sek hi. May 5,2018 akhan Kristiante college nei lak a ahawi pawl a gen, St. Stephen College Biakin (Chapel) chu khawi siat ahia, Biakin kawtkhak ale ti gual hin thuki jik nutsia ahi, “Zia mun ahin Mandir sak hi ding ahi”.

Kum 2015 March tha akhan “Nun” pakhat, kum 75 mi chu pawngsual in a um hi, zia gual ma chun 2008 akhan Odisha,Kandhamal District ale “Nun” pakhat pawngsual ahi kit hi.

2014 apat in Kristian ni pawimaw ma ma, Christmas ni chu” Good Govenance Day” in puan ahia, Khristian te’n chawl-ni (Pathianni) gual a i ngai uh, pawimaw ma ma ni nasan leh chawl ni a mat theitalo ding khawp a thil hung tung ahi tai. A diak a Govt nasemte ading in haksatna lianpi tak atun hi. Khristiante lungthim a suna ma ma hi.

Bawng buai in a ahung buai kit ua, bawngpi thiangth-na ngaitua in “National Holy Mother” ti a puangin suksiat-lona dingin thapi a hun thaw kit ui. Bawng jun hi a thiangtho ahi ti ah dawn pawl tawh, athi

phat leh vui taklo ding Hindu dan ah hal ding ahi ati ti pawl taw, Bawng sa ne nuamte chu Pakistan gam lam in chiau hen ti pawl taw...gen ding atam.

c) Tangko/Thangkona ngai saklo:

Sappau a “Structural Violence”, Min a chung a thil diklo a tuak phat leh thuneitute kianga a tangko theina dan nei ahi. Maleh dan lama thuneitute chun Kristiante thil tuak hi a ngaitua piak ahi ngai puau.Sum, Lalna, thuneinate leh chanpha zosia Hindute’n aki chan sek ui. India gam masawna ti ah agen sek uhi le nam lian leh sanga ki kawu Hindute genna ahi sek hi.

India gama Kristian tam jawpi hi nam nuai nung - Dalit leh Tribal te ahiu. Hindu nam sanga kikawite hin amusit ma ma sek ui. Kikhawpkhawm-na anei lai un nawjak leh haw jak ahi mun ma ma ui. 2015 March akhan Jabalpur(MP) khawpi a “Bible convention” manga kikhawm khawm lai chu kua ahi hetloten a naw jak ua, Kochuam gamte chu lak piaka Govt. gam a siam, juau a hek leh matsakin, naupang nasan



a hawi diak puau. Zia thilziak ahin dan leh thupiak enkawltute kianga tangkopi sek maleu ngaisaklo in a um ui.

Kum 2008, Aug 25-28 akhan Odisha state, Kandhamal Distt. ah Biakin 300 val ding vel leh Kristiante in 6000 suk siat piak in a um hi. Chun, gingtu mi 5600 vel gal jam in a siam ua, mi 100 vel in hinna a chan ui, Hindute jia kin. Amau a dinga sawlkar a thunei leh dan leh thupiak enkawltute kianga tangko in um jia a nei puai.

Zia buaina ah a maw pawtu a ngaw a um Mr. Manoj Pradhan (ahun laia BJP MLA) chu tual tha thubuai 7 jet siam piak ahin maleh 2011 akhan "bail" in pawtsak ahi. Kristian mi 7 amat teu vang chu tu tiang ahin thadaw ahi nai puau.

Zia gual thil vel jia ka chun Police ko in um jia a um puai, Kristian te chu athuak tu

ahi jel mai ui. Panpitu neilo leh a tangko nau ngaisaklo in bang chan um nalai ding ahi diam uh ????

Min a ginnau jia kin haksatna gen guallo tuak in, hinna nasan ala chan tau a... ei hawn vang haksatna gen kham le i tuak nai puau. Itmut tui takin hun i mangthei nalai ua, ki tuak lo, ki gensia, ki thulak lo, kithat, kimat leh adang dang. Kochuam sung leh khawtanga buaina la ki bang. Bangtik ni hem le ilak ua hung tung pai ding ahi tai. Kingatua thakin haksatna hung tun hun a i do jo thei na dingun l itmutna apat hal in malam sawn in kitawl tai tiu.

Zia mun ahin i um sawt ta law tau.

**Amen!**

---o0o---

**Pa Pathian min te lak ah chungnungpen  
ALPHA(Abul) leh OMEGA(Atawp)  
Thup. 21:6**

*~T.Upa Singzalian*

“

**B**elamno thisan ah a puan uh sawpvamte leh thawkitna masa ah pangte chu a thiangtho un a vang uh a pha'i, amau chung ah chun thinina chun thu anei puai".(Thup.7:14; 20:6)

(a) **ALPHA**(Abul) hin kipat hun leh tawp hun a nei ah, zia chu-Noah hun(tuisanglet zaw) apat ah simto in Rapture(Mi thi-angtho lâklâwk) tiang a huap hi.

(b) **OMEGA**(Atawp) hin Rap-ture(Mi thiangtho lâklâwk) zaw ah pat in lei thak leh vanthak tiang hi a huap hi(Thup.21).

**ALPHA** (malsawmtu) leh **OMEGA**(Hansialawtu) hina te:

(a) **ALPHA HINATE**(Danbu 11:26) : Hepitu, Kipaksaktu, Thamuantu, Ngilnei leh Ginum-na neitute hi ahiau(Gal.5:23,24)

(b) **ALPHA HINATE**: Huatna dimtu, Kâna neitu, Lau umna dimtu, Thikthusiatna dim, Lung-natna dim, Huaihapna dim leh Ngaisaklotu te ahiau.

(c) Amasan,

Unau simtu dawitakte, I Bible bu pumpi a bul Genesis

apat ah Juda lekhathawt tiang a dinga hin alusin(Asit) dingin pa Pathian in, Pathian mi thi-angtho John kiang in thupuan-dawk hi ala pia, zia thupuan-dawk bung pumpi thumal, thuthung, thupiak leh thutiam te ahin ama(Pa Pathian) hina bukim Alpha leh Omega te ni hi ahu thakhum Bible bu pum-pi thumal zosiate lusit(asit) in a mang hi ti hi i hiatchian masak pen uh a kul takzet ahi.

A chung ah i suklat tak uh, Alpha hun hi Lalpa Jesu'n a cross kiput ah eimau thinina(-Meidil) changta zosiate thina ngei chu Cross ah kilden in a nuaimangta, kua hitaleh zia chu ama a ngei ahi ti ah pawmtu te chun Lalpa Jesu hi Lal ah leh hukdampa ah apawm theina ding ua hun kipak um huk-damna ni hi ei hawnpiak ahin, chuleh van ah guchate'n a guk

theilonau leh nget in le aneksiat theilona ah go khawlkhawmna hun phapen Alpha(malzawltu) in a huap hun sung ahi.

Zia chu ahiziakin simtu dawitak i Lalpa Jesu khrista zal ah Alpha(malzawltu) malsawmna chi 7te a chapa changkhat neisun mangcha ahun chawkpiak te hi la nei taktak na em? la neilo khak pal ahi leh vang la thi phat phat leh nang a dingin Rapture hin tin, Alpha kha Omega hi ngal ding ahi ti ala hemil kin aw..! lungsiat umpen hi kha tâwl inla, a vaigei ma in..!!

(d) Omega(Hansialawtu) hun ahin simtu dawitak, malzawlna chi 7 te bep kha hitaloin thagau thiangtho leh hun kipak um hukdamna nite zosia hi Alpha(malsawmtu) chun vãn sÛm chungah (Boruak) ah chapa changkhat neisun ei tantu Lalpa Jesu'n a vansawlchak chungnungpen aw ngei chun van lam ah hipto vek ding ei ta'n, zia hun mama ah chun Omega(Hansialawtu) hung kipan ngal ding ahi ti hile hiatchian a pawimaw takzet ahi. Zia hansialawna chi 7te hi i chan ding hung hi ngal ding ahi ti hia'n unau muang ta puai

tiu aw. Zia a mabak ala un ngeingei ding/tung ngeingei ding chu thinina(Meidil) chu kumtuang ah lawman umsun chu ahi mai hi.

Unau dawitakte, atawpna'n malzawltu(Alpha) hun a beima ngei leh thankhuk thim Omega in thinina(Meidil) ah le chamlo ah ahun sawl ma ngei ahin Belamno, Khrista Jesu thisan dem kailo thinina, Meidil zotu umsun ngei ah chun la lunggil zosia, la hatna zosia leh la hiatna zosiate kha a hun sawp vam piak ah Alpha'n Khrista Jesu mangcha a vansawlchak chungnungpen 'Aw' ngei ah a hun hipto ah van lam ah Omega la Bye bye thei ngei na dingin, simtu dawitak, Khrista Jesu min thiangtho sal in ka hun chial takzet ahi aw..!!

A tawppen in ka sua-pite thinina(meidil) Pathian in (Alpha leh Omega) in a siam hi nang leh kei leh Noah suante a dinga siam ahi puai; Melma lÛn a min diktak 'Lucifer'(Zinglam chapa) amin dang a nasep dungzui ah kikona-Diabol, Setan, Khrista dodaltu leh a sawlchak helmangte a ding ah Pathian in thinina Meidil hi

a siam ahi ti i hiatchian ding uh hi a kûl pen ahi, ti hi i suklat nawp pen te lak ah khat chu ahi.

I thugen uh i zawn ding un zia i heading ban tak ua Bible chang in a gen gual ngei in Unau, Belamno Lal Jesu thisan ah i lunggil sawpvante lak ah panga thawkitna masa (Meidil) thinina zotu hi ah Pa Pathian lemguat na dungzui ngei ah a mitmu ah thiangtho

leh vangpha ihi thei ngei na ding un Pa Pathian min bukum malzawltu leh hansialawtu (abul leh tawp) aman ei hun sawl piak i lak ngei ua um zing thagau thiangtho Pathian mangcha in a lopina ding ngei in a thu mawltak leh kimlo tak ah i gen teu malzawl ta hen, chuleh i gen tinlo leh belap khak a um chun Pa Pathian in ei ngaidam taken..Amen..

---o0o---

**JAKOB IN JORDAN LUI HI KA TIANG KHUT BEP  
TAWH KALA KAN IN...A TI TAWH  
KSP KIBAT KA SAKNATE**

*~Rev. Thanglianmang*

**Thumasa:**

Genesis 32:10 na Jakob in zia Jordan lui hi ka tiangkhut bep tawh ka la kan in, tuhin chu hawn ni hial ka hi tau hi, ati tawh ei uh KSP in malzawl na idawnteu tawh ka tekhin sek hi. Jakob chu a pute khawlam ah achia a khan a tiangkhut ti longal bangma a nei puai. Ahinla, a vakhawsakna gam a chun Pathian in a mal-sawm in, suak leh gancho tamtak ban ah cha leh nau tamtak tawh In lam a hung kile kit hi. Jordan lui a kanna mun ma chu a hung kan kit in, ahileh a kan masak tawh a kannunung chu kikhia asa ma ma hi. Zia guala chun ei uh KSP hile a kipat chanchinte haw hi mawl tak ahi ban ah puitu masate haw le sim maw um tak himaleh tuhin chu Pathian in malsawmna chuam chuam in ei jangvuk ta ahi. Pathian in Abraham chu gancho tamtak a malsawm leh asuapi Lot ganchate tawh atatna di'u gam a neu takdan chanchinte haw kha ei uh KSP tawh le ka tekhin sek ahi.

## **1. Malsawmna I Dawnteu-Vak En Khawm hitiu:**

### ***i. Semtu kibelap zel leh sepna mun:***

Semtu chuam chuam pastor, evangelist, evangelist teacher, office staff, PWF Semtu (Office & Home), CKKP semtu co-ordinator leh a dang dang haw kibelapzel in aki um hi. Zia ban a chun Manipur pawlam shilling ah kochuam kinei thei leh Delhi ah Vaiphei Christian Fellowship ah pastor kisawlthei in a ki um tai.

### ***ii. Sum kiningting deu leh mun leh mual chawk thu:***

Masang ah semtute thasin ah a law uh kipezolote kha tuhin I pan khawmnau ziak in thasin ah hawitak ah I kipethei tau. Synod lam ah piak ding dawlte haw phatak ah I piakzethei ban un mun leh mualchuam chuam leh a diak ah, KSP munpi ding crore khatval man chaw thei in a ki um ta ahi.

### ***iii. PWF leh CKKP project :***

Nupi lam PWF te'n naupang etkawlina (*The Good Shepherd Home*) phatak a enkawl un, Khanglai lam CKKP in le income generating project ding ah Insak ding atup thei kit ui.

### ***iv. Thiamzilna (school) lam:***

Tonglon 'D' mun leh John Calvin Academy, L. Champhai ah school I neiteu belap ding ah Tispari Mission Field ah school I nei belap kit thei ui.

### ***v. Lekhasiam leh Magazine:***

Piting Sunday school thuzil bu, beigual thuzilbu leh Damna Aw magazine haw eimau khutsuak I neithei tau hi.

### ***vi. Bible zilna leh puitu lam :***

Pastorte haw M.Th tiang bang a kium thei kit in, chuleh pastorte, PWF te leh CKKP lam haw le Synod, General Assembly tiang leh Kochuam dang tawh pankhawmpuitu leh member ah pangthei ta aki um hi.

## **2. Malsawmna Dawna Ziak Ding ah Ka Ginchatte**

### ***i. Puitu masate chung Pathian lungdam ziak:***

Puitu masate thutak leh ginumna ga khangthakte'n kidawng hidi'n ka gel hi.

### ***ii. Missonary nasepna hapan ziak:***

Jesu'n Khawvel zosia chia unla, chanchinphahil in alati thupiak ngaikhawk ah missionary nasepna lam I ha bawl ziak uh hidi'n ka gel hi.

**iii. Puitute pankhawm ziak:**

Committee na ngaidan kibatlo chang umsek maleh a tamzaw dawidan chu Pathian Aw ah ngai ah kilungtuak ah chia khawmzel thei ziak hidi'n ka gel hi.

**iv. Seminar leh Training ha bawl-ziak:**

Doctrine leh Kochuam kikaihucaina kiziltin kiha bawl ziak hidi'n ka gel hi.

**v. Kochuam chanchin kihettuana hat ziak:**

Office a pat lekhaki-hawmte, Damna Aw magazine te, phone ah whatsapp ah news te leh a dang dang a um ziak hidi'n ka gel hi.

**vi. Biakn sak ziak:**

Zawlnei Haggai kian-ga Israelte Pathian in a gawt ziakchu biak In a saklo ziak uh ahi atia. Tuhi ei un biakin sak I ha bawl uh hi Pathian lungdam hi di'n ka gel hi.

**vii. Thawlawm piakna envelope mat ziak:**

Bul lam a ding lehkochuam a ding sum I khennau hin kochuamte a lungawi ziak ua I ha pan chiat uh hidi'n ka gel hi.

**viii. PWF leh CKKP ten aseppathian kipak:**

PWF te'n nu leh pa nei-lote etkawlna (Home) a bawl ban ua, KSP a ding ah an ngawl pauchapna a nei sek ua, CKKP mapuina khanglai tam-tak in Bible khut ah ziksuak thei ah a umnateu haw ka ngaitua leh Pathian in a pan laknateu malsawm hidi'n ka gel hi.

**ix. Jubilee Chuamchuam matna Pathian lungdam:**

Pate, PWF te leh CKKP in Golden jubilee I mangzo chiat tau ah, zia haw I matnau a chun Pathian Lungdam ah eimalsawm hidi'n ka gel hi.

**Thutawpna:**

Malsawmna tamtak I dawn nau ahin sep ding tam-tak ziak in buaina le a um thei in, ahinla Pathian malsawm-nate buaina manglo ham di'n I kichial ahi. Chuleh, mite I phaklonau tamtak um nalaithe Pathian hatna suangin delzel hitiu. Pathian malsawmnate kiletsakna leh chapon a I mat khak chun I pawlpi kilikna ding naicha um ahiti hezing hitiu. Pathian I chung ua a lungdam chun malsawmna tamtak I dawndiu um nalai ngei ding ahi. Ama bep suang in malam sawnzal hitiu.

# LIMNA LEH KIPAKNA PIAK LAHIU

~Upa Laltinkhup

*Limna hi thagau ga l thinlung sung ah hun tuttu chu thagau thi-angtho ahi (Gal.5:22)*

Hukdam chate limna hi Pathian ah kipat hungdawk gingtute ah hung luanglut chu ahia, haksatna leh buaina chung a leng ahi. Hukdam chate kipakna chu Khrista ah kinga ahi ziakin kua-man ei lak piak thei puai(Jn.16:22)

Hukdam cha hilote'n vang lim theilona tiang, felnunga bep lim a gawsek ui. Lim theilona pakhat a sukiang ua, lim avak guau a, lim theilona khat ahung tung kit a, a limlo khawlaw jel ua, chutichun, lim hun neilo(mulo) in a um sek uh ahi.

Hukdamlote limna chu pawlawng bep in a um a, a thuk pua, a thatnawpna le that nawpna mai mai ahi sek hi. A dawigual ua thil a tun leh a lim ma mau a, haksatna sũm a hun zinzet le vang a limna cheng cheng uh chu a chuaizo kit sek hi. Thagau Thiangtho ah kipakna ahile vang haksatna leh thawkna chung in a leng dai ah, lungngai gual in, himaleh lim leh kipak jing in, gen-thei gual in himaleh, mi tamtak hi haus a ngal in, bangma neilo gual in himaleh, bangkim nei bukim ngal in a um zaw'u ahi.

Paul nunchan apat hin zil ding i hau khawpmai ui. Su-angkul gimse taka a um lai inle, "Ei hihatpa Khrist jal ah chun bangkim bawlthei ka hi." atina lai hi (Phil.4:13). Lalpa ah chun kipak jing sek un ti kit ngen ingka, kipak un tite a zik a, lim leh kipak hi hukdam chate chanvo dinga Pathian guat ahi.

Thusut mite chun, kikhawm ngailote sang in kikhawm sekte hi a damsawt zaw'u atiu a. A ziak chu kikhawm sekte chu a lim sek ziak uh hingei in a. Kikhawm sekte le a lim diaklo ua le vang a damsawt chuamlo maithei bawk ui. Lim hi hiselna ding inle a pha ma ma hi.

Pathian gam hi nek leh dawn thu ahipuan, Thagau Thiangtho ah dikna, thamuanna leh kipaknate ahizaw ngal a.

*Lalpan a thu malzawlta hen!*

## ‘DAMNA AW’ PHUNGVUKTUTE :

### PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Upa Laltinkhup, HQ. Church, Tuibuang
6. Pi Manliankim, HQ. Church, Tuibuang
7. Nk. Lalsangpui, S.Kotlian
8. Upa D. Mina, Lingsiphai
9. T.Upa Ph. Gena, Lingsiphai
10. Pu. Khamlal Saipum
11. Pu Khamliankap Saipum
12. Pu. tinlunlal Saipum
- 13, Pu. S.Kapbawi New Delhi
14. Upa Genhau Central Church,Compound veng
15. Pu. Khailianbawi Central Church,Compound veng
16. Pi Kimtawi Kohima

### MEMORIAL GIFT :

1. Pi Deem Melody, **Central Church, (Rengkai)**  
*[in loving memory of (L) Upa Lamthianlal]*
2. Pi Rebekah **Kangvai**  
*[In loving memory of (L) Pastor Khaivung]*
3. Upa Liansomthang **Lingsiphai**  
*[In loving memory of (L) Pu. Henzagen]*
4. Pi. Nem Grace Boisi Capvung **Delhi**  
*[In loving memory of (L) Pi Vanlalchhuangi]*

### SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L. Mission Veng



12. Rev. S.T.Kaia Vaiphei Nghathal  
 13. Pu. Hausang Shillong

### ENCOURAGERS :

- |                              |                                |
|------------------------------|--------------------------------|
| 1. Pu P. Kamneilian,         | Lingsiphai                     |
| 2. Evan Thianlam             | Lingsiphai                     |
| 3. Pastor Kaiminlian,        | L. Saronphai                   |
| 4. Upa K.Thanga,             | Kangvai                        |
| 5. T.Upa Manglem,            | Kangvai                        |
| 6. Upa S.Bela Capvung,       | Kangvai                        |
| 7. T.Upa David,              | HQ Church, Tuibuang            |
| 8. T.Upa Khupneu,            | HQ Church, Tuibuang            |
| 8. T.Upa Zamthamuan          | HQ Church. Tuibuang            |
| 10. Pu Lamthianlun,          | Central Church, Compound Veng, |
| 11. Pu Vendam,               | Central Church, Compound Veng, |
| 12. Pu Haudal,               | Nghathal                       |
| 13. Pu Khamliankhual,        | Nghathal                       |
| 14. Pi Mary Vaiphei,         | Nghahal                        |
| 15. Upa Paukholam            | Nghathal                       |
| 16. Pu Tongzahem             | Nghathal                       |
| 17. Pi. Nunmawi              | Ngahthal                       |
| 18. Pi. Kimbawi              | Nghathal                       |
| 19. Pu Kaikham               | Saipum                         |
| 20. Pu Pauthianlal @ Mengpu, | Saipum                         |
| 21. Upa Ginneithang,         | Saipum                         |
| 22. Pu Donggen               | Saipum                         |
| 23. T.Upa. Lallawmthang      | Saipum                         |
| 24. Pu.Damthang              | Saipum                         |
| 25. T.Upa Ginlun             | Saipum                         |
| 26. Pu Kaipau                | Saipum                         |
| 27. Pu. Khamthianlun         | Saipum                         |
| 28.Upa. Kaijuanthang         | Tangmual                       |
| 30. Rev. Haulalven           | Tangmual                       |
| 31. Pu Gomang                | Tangmual                       |
| 32. Pu Kamneilal             | Tangmual                       |
| 33. Pu Kaisawmlal            | Tangmual                       |
| 34. Pu Thangneilun           | Tangmual                       |
| 35. Pu. K.Minlian            | Tangmual                       |
| 36. T. Upa K.K. Siam         | Tangmual                       |
| 37. Pu. Khamlallawm          | Tangmual                       |
| 38. Pi. Niangphal            | Bisanmual                      |
| 39. Upa Thangpu Changsan     | Leimakhong                     |

40. Pu. Khamsawngolian	Kohima
41. Upa Nehneithang	Leilon
42. Upa Khupmang	Leilon
43. Pi. Hawiniang	Leilon
44. Upa Tongneilal	Leilon
45. Upa thangmang	L.Champhai
46. Upa Ph. Kamlam	L.Champhai
47. Upa S.T.Siam	L.Mission Veng
48. Pu. Seidam	L.Miaaion Veng
49.Pu. Hentinmang	L.Mssion Veng
50.Pu. Malzawl	L.Mission Veng
51.Pu. L.K.Vaiphei	L.Mission Veng
52.Pu. Lemlian	L.Mission Veng

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazel i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
- (ii). Supporting member- Kum2(two) a ding in ₹. 2,000/-
- (iii). Memorial Gift- Kum 2(two) a ding in ₹. 2,000/-
- (iv). Encourager- Kum 1(one) a ding in ₹. 1,000/-

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, ccpur**

**CIF**

**nos: 86412486695**

**IFSC nos: SBINOOO6182.**

***Editor***